



Impact Assessment Agency of Canada
Government of Canada
160 Elgin Street, 22nd Floor
Ottawa ON KIA OH3

Mary River Project, imm. 2 pillugu tusarniaanermi akissuteqaat

Espoo-mut nalunaarusiaq

Mary River Project-imi suliassamut siunnersuut siulleg 2012-imi, suliassap nunap killeqarfii qaangerlugit sunniutissai pillugit Kalaallit Nunaannut sumoortumik tusarniaasoqqaarani Canadami oqartussaasunit akuersissutigineqarpoq. 2018-imi Baffinland suliassamik annertusititsinissamik, immikkoortoq 2-mik taasamik qinnuteqarpoq. Qinnuteqaammut tassunga atatillugu 2018-imi suliassamut siunnersuummut siullermut tapiliussassamik suliaqartoqarpoq. Tamatuma peqatigisaanik nalunaarusianik, teknikkimut tunngasunik, annertusititsinerup kingunerisassaanik paasissutissiiffiusunik arlalinnik suliaqartoqarpoq. Suliassamut siunnersuummut siullermut imaluunniit immikkoortoq 2 pillugu siunnersuummut atatillugu Kalaallit Nunaat Espoo-mut isumaqatigiissummut tunngatillugu tusarniaaffigineqarluni Canadamiit attaveqarfigineqanngilaq.

2020-p aallartinnerani Nunalerinermut, Imminut Pilersornermut, Nukissiutinut Avatangiisinullu Naalakkersuisoqarfiup (matuma kingorna Naalakkersuisoqarfik) Canada Espoo-mut suliassamik aallartitsisoqarnissaa pillugu qinnuigaa. Suliassami killeqarfiit qaangerlugit sunniisoqarsinnaanissaa Naalakkersuisoqarfimmit annilaangassutigineqarpoq. Naalakkersuisoqarfiup qinnuteqaataa Canadamiit akuerineqarpoq, aammalu 2021-mi februaarimi Espoo-mut nalunaarusiaq Naalakkersuisoqarfiup tiguaa.

Espoo-mut isumaqatigiissut naapertorlugu Espoo-mut nalunaarusiami suliassami killeqarfiit qaangerlugit sunniutissat allaaserineqartussaapput naliliiffigineqartussaallutillu. Espoo-mut nalunaarusiaq nassiunneqartoq suliassamiit Canadami suliassamut attaveqaatit eqaanni sumiiffimmi killilimmi killeqarfiit qaangerlugit sunniutissat naliliiffigineqarnerinik imaqarpoq (MRSA). Tassalu Espoo-mut nalunaarusiami misissuinerit, Canadami sumiiffimmi najugarineqartumi ingerlanneqarsimasut tunngavigineqarput, aammalu umiarsuit assartuutit angisuut atorlugit Baffinbugt-ikkut, aammalu Kalaallit Nunaata kitaata sineriaa sinerlugu, sumiiffiillu siornatigut umiarsuit angallannerinit akornusersorneqarsimangitsut aqqusaarlugit saviminissamik assartuussinermi kingunerisassanik naliliinerit ilaatinneqaratik.

Espoo-mut nalunaarusiami pigineqartumi suliamut, Espoo-mut isumaqatigiissut naapertorlugu Naalakkersuisoqarfiup tusarniaaffigineqarnissamut

Allakkat ulluat: 15-06-2021
Suliap normua: 2020 - 1766
Allagaatip ilisarnaataa:
17017552

Postboks 1614
3900 Nuuk
Oqarasuaat: (+299) 34 50 00
Fax: (+299) 34 54 10
E-mail: pan@nanoq.gl
www.naalakkersuisut.gl

qinnuteqarnissaa ukiunik marlunnik sioqqullugu Canadap iluani inissinneqartoq tunngavigineqarpoq. Taamani suliassamut killiliussami suliassap Kalaallit Nunaannut kingunerisassai eqqarsaatigineqarsimanngillat, taamaattumillu Naalackersuisoqarfik naliliivoq, Espoo-mut nalunaarusiami killeqarfiit qaangerlugit sunniutaasinnaasut tamakkiisumik nassuiaatigineqanngitsut. Taamatutaaq Baffinland-imiit suliassamut siunnersuummi siullermi killeqarfiit qaangerlugit sunniutaasinnaasut misissorneqarnissat naliliiffigineqarnissaallu itigartinneqarsimavoq, suliassap tassunga tunngasortaa 2012-imi Canadami oqartussaasunit akuersissutigineqareersimanera tunngavilersuutigalugu.

Killeqarfiit qaangerlugit sunniutaasinnaasut

Matuma siuliani allassimasut tunngavigalugit Naalackersuisoqarfiup suliassami killeqarfiit qaangerlugit sunniutaasinnaasut pillugit annilaangassutigisinnaasau ukuninnga immikkoortoqarput:

Qilalukkanut qernertanut aamma qilalukkanut qaqortanut sunniutaasinnaasut

Nunarsuatsinni qilalukkat 15%-iisa missaat aasaanerani Eclipse Sound-imiittarput. Qilalukkat qernertat tassaniittut ukiuunerani Kalaallit Nunaata Kitaani Qeqertarsuup Tunuani pisarineqartartut affaasa missaannik amerlassuseqartarput. Qilalukkat qernertat nalinginnaasumik Issittumi, taamaallaat sumiiffinni avinngarusimasuni, umiarsuit angallaffiginngisaanni, aammalu maannamut inunnit ikittuaraannarnit tikinneqartartuni nassaassaasarpur. Uumasut taakku nipimut malussajasorujussuupput, aammalu suliap kingunerisaanik umiarsuit angallatillu annerit angallattut amerlissappata, tamanna uumasooqatigiinnut sunniuteqarsinnaavoq. Qilalukkat Eclipse Sound-imi aasisartut ikileriassappata, imaluunniit Qeqertarsuup Tunuani ingerlaartartut umiarsuarnit saviminissamik usisunit akornusersorneqalissappata, tamanna qilalukkat qernertat Qeqertarsuup Tunuaniittartut amerlassusaannut, taamatullu aamma pisarineqarsinnaasunut sunniuteqartussaavoq. Tamanna pissutigalugu Kalaallit Nunaannit suliassap qilalukkanut qernertanut sunniutissarpiaasa ilisimaneqarnissaat soqutigineqartorujussuavoq.

Kisiannili Espoo-mut nalunaarusiami taamaallaat qilalukkanut qernertanut Eclipse Sound-imiittunut, aammalu Canadap sineriaata qanitaaniittunut sunniutissat paasissutissiissutigineqarput. Nalunaarusiami Canadap aamma Kalaallit Nunaata akornanni imartami umiarsuit angallannerisa qilalukkat qernertat angalaarnerisa nalaani angallaviinilu pisarnissaat, tamannalu qilalukkanut qernertanut sunniuteqarnerlussanersoq naliliiffigineqanngilaq. Taamaattumik Naalackersuisoqarfik isumaqarpoq, Espoo-mut nalunaarusiami suliap qilalukkanut qernertanut, Eclipse Sound-imiittunut sunniutissaanik naliliineq tamakkiisuunngitsunik tunngaveqarluni suliarineqarsimasoq. Tamanna aamma qilalukkanut qaqortanut sunniutissanik naliliinermut atuuppoq.

Arfivinnut sunniutissat

Kalaallit Nunaat nunani tamalaani arfiviit illersorneqarneranni akisussaaffeqarpoq. Arfiviit Baffin Bugt-imeersut 30%-ii sinnerlugit Kalaallit Nunaata kitaani uumasuupput. Arfiviit angisuujupput arriitsumillu ingerlaartarlutik, aammalu umiarsuit nipiliornerinit sunnertiasuupput. Suliap

kingunerisaanik umiarsuit angallatillu annerit angallannerat annertusissappat, tamanna arferit toqqaannartumik aporneqarsinnaaneritut, kiisalu Canadap aamma Kalaallit Nunaata akornanni nuttartut akornusersorneqarnerisa annertusineranut ulorianartorsiorneq annertusisussaavoq.

Matuma siuliani immikkoortumi, qilalukkat qernertat aamma qilalukkat qaqortat sunnerneqarnissaannut tunngasumi allaaserineqartutut Espoo-mut nalunaarusiami taamaallaat Canadami sumiiffimmi misissuiffiusumi killilimmi (MRSA) arfivinnut sunniutissat nassuiaatigineqarput, tassanilu uumasooqatigiit nuttarnerminni aqputaat piffissallu nuttarfigisaat nalerorlugit umiarsuit angalasarnersut isummerfigineqanngilaq. Iliuusissat pinaveersaartitsissutaasussat (soorlu sukkassutsimik killilersuineq aamma aalajangersimasumik siunnerfeqarneq) taamaallaat Canadap imartaani suliaqarfiup iluani atuutsinneqarput. Taamaalilluni Espoo-mut nalunaarusiami suliap Kalaallit Nunaata kitaani arfeqassutsimut pisaqartarnermullu sunniutissai isummerfigineqanngillat. Taamaattumik Naalakkersuisoqarfik isumaqarpoq, Espoo-mut nalunaarusiami suliassaq arfiivit amerlassusiinut sunniuteqassanngitsoq pillugu naliliineq tamakkiinngitsunik tunngaveqarluni suliarineqarsimassasoq.

Aavernut sunniutissat

Kalaallit Nunaata kitaata avataani ikkannerit sikullu ingerlaartut aavernut neriniarfittut piaqqiorfittullu pingaaruteqarput. Aarrit akornusersorneqarnissamut malussajasuupput, tamannarpiarlu peqputigalugu Kalaallit Nunaata kitaani nunami najukkaminniit siusissukkut tamarmik qimaguttarput. Suliaqarfimmiit umiarsuit angallattut aammalu Ikkannersuarni kisarsimasartut amerlissappata, tamannalu aarrit Kalaallit Nunaata kitaani tikerarnerisa najugaqarnerisalu nalaani ingerlanneqassappat, tamanna uumasooqatigiinnut sunniuteqarnerlussinnaavoq.

Espoo-mut nalunaarusiami taamaallaat sumiiffiup misissuiffiusup iluani (MRSA) aarrit amerlassutsimikkut killeqarnerat isummerfigineqarpoq. Taamaattumik nalunaarusiami umiarsuit angallannerini Ikkannersuarni, kiisalu Baffinbugtimi aammalu Hudson Strædet-imi aarrit amerlassutsimikkut sunnerneqarnissaannut naliliinissaq amigaatigineqarpoq. Tamanna pissutigalugu Naalakkersuisoqarfik isumaqarpoq, Espoo-mut nalunaarusiami suliap aarrit amerlassusiinut sunniuteqartussaannnginneranik naliliineq tamakkiisumik tunngaveqarluni suliarineqarsimanngitsoq.

Ikkannersuit aamma uuliaarluertoqarnissaa

Ikkannersuit Kalaallit Nunaata kitaata sineriaata avataani imartaapput malussajasut. Sumiiffik imaani uumasut miluumasut, imaani timmissat uumasullu natermiut inuuniarfigaat neriniarfigalugulu pingaarutilik. Suliassami allassimavoq, sumiiffik sikuernissaanut, aammalu umiarsuit saviminissamik usisut Pond Inlet-imut angalasinnaalernissaannut utaqqiffittut kisarfiugallartartussaasoq.

Espoo-mut nalunaarusiami umiarsuit Kalaallit Nunaata imartaatigut angallannerinut aammalu Ikkannersuarni kisarsimasarnerinut atatillugu ulorianartorsiorfiit matuma kinguliani allassimasut naliliiffigineqanngillat:

- Imaani uumasut miluumasut aporneqarsinnaapput, imaani uumasut ajoqusernerinik toqunerinilluunniit kinguneqartumik
- Ikkarlittoqarsinnaavoq, umiarsuup ajoquserneranik imaluunniit tappiorannartut imarmiut ajoqusersinnaanerinik kinguneqartumik
- Sikut angallatillu akornanni sunneeqatigiittoqarsinnaavoq, kinguaattoormik imaluunniit angallatip ajoqusersinnaaneranik kinguneqartumik
- Umiarsuarnut allanut aportoqarsinnaavoq, umiarsuup ajoquserneranik aammalu tappiorannartut imarmiut ajoqusersinnaanerinik kinguneqartumik
- Umiarsuit angallavii sinerlugit annertunerusumik uuliaarluertoqarsinnaavoq, umiarsuit angallaviat sinerlugu immami sinerissamilu avatangiisinik mingutsitsinermik kinguneqartumik

Taamatutaaq Espoo-mi nalunaarusiami iliuusissanik, umiarsuit Kalaallit Nunaata imartaatigut angalaneranni sunniutaanerlussinnaasunik annikillititsiniarluni pinaveersaartitsissutaasussanik siunnersuuteqartoqanngilaq. Naliliineq uuliamik ikummatissamik kinertumik (HFO), uuliamik annikitsumik ikummarsaatitalimmik (LSFO) aamma imarsiornermut gasuuliamik (MGO), immikkoortoq 2-mut siunnersuut tamakkerlugu umiarsuarnit saviminissamik usisunit atorqartussanik kuutsitsinermi ulorianartorsiorfiusinnaasunik naliliinernik ilaqartariaqarpoq.

Inassuteqaat

Naalackersuisoqarfimmit inassutigineqarpoq, suliassap immikkoortuanut 2-mut ataatsimoortumik avatangiisit pillugit naliliinermik suliaqartoqassasoq. Avatangiisinik naliliinermi sumiiffiit Mary River Project-imit sunnerneqartussat tamarmik ilaatinneqartariaqarput – taakkunungalugu umiarsuit angallavii, sumiiffinni nalinginnaasumik umiarsuit angallannerinit akornusersorneqanngitsuni inassisimasut sinerlugit inuuniarfiit nuttarnermilu aqqudit sunnerneqarnissaat ilaatinneqassapput.

Kiisalu Naalackersuisoqarfimmit kaammattuutigineqarpoq, siunissami sulianut, Espoo-mut isumaqatigiissut naapertorlugu killeqarfiit qaangerlugit sunniuteqarsinnaasunut atatillugu Kalallit Nunaat siusissukkut akulerutsinneqartalissasoq.